



淳

熙

稿

一





稿 熙 淳

(一)

撰 蕃 趙

淳熙稿目錄

卷一

四言詩十三首

五言古詩九十八首

卷二

五言古詩一百二十二首

卷三

五言古詩七十七首

卷四

五言古詩七十八首

卷五

七言古詩七十四首

卷六

七言古詩七十一首

卷七

五言律詩二百十三首

卷八

五言律詩一百六十首

卷九

五言律詩一百七十一首

卷十

五言律詩一百五十四首

卷十一

五言律詩一百五十一首

卷十二

五言長律詩三十五首

七言律詩七十七首

卷十三

七言律詩一百十七首

卷十四

七言律詩一百三十二首

卷十五

七言律詩一百二十一首

卷十六

五言絕句一百三十七首

六言絕句四十七首

卷十七

七言絕句二百四十首

卷十八

七言絕句一百九十一首

卷十九

瀟 熙 稿 目 錄

七言絕句二百二十七首

卷二十

七言絕句二百二首

涪熙稿卷一

宋 趙 蕃 撰

四言詩

碧雲三章并序

碧雲思親友也。孫鄭暨徐期以入山。旣期而愆。聊發我言。碧雲散舒。合且復離。皓月湧照。圓而不虧。嗟我所期。曷云不來。翳翳村巷。遙遙大聲。肅肅庭樹。啾啾鳥鳴。所期不來。實關我情。寒鐙旣張。幽室有光。豈無他人。惟子之良。閉彼柴荆。今夕斯長。

三月十三日夜。五更聞杜鵑。時成父欲入浙。因賦六章。章四句。以送之。

不如歸去。蒼山茂樹。獨胡爲乎。空此號諄。歸去來兮。斯言可師。我今已歸。胡能不知。不如歸去。春且云暮。山中之樂。豈同歧路。歸去來兮。言發動隨。古之逸民。舍陶而誰。

不如歸去。載丁載寧。勸子勿去。子寧我聽。
不如歸去。子寧肯住。歸去來兮。早歌式微。

山行見月作四首

有風肅然。落於樹顛。使我沈痾。不藥而痊。
意行何之。陟此雲嶺。如夢而覺。如昏而醒。
東坡老翁。有言莫酬。涼天佳月。卽爲中秋。
恨我無酒。負爾一醉。酌茲寒泉。兀爾忘睡。

五言古詩

古意二首

齊王昔好竽。有客工鼓瑟。持之立王門。三年不得入。不知所好異。卒致遭怒叱。我今幸早計。歸去無自逸。
曾聞蜀道難。難於上青天。蜀道難何以。嵯峨劍門關。未抵鄱陽湖。無風浪掀船。脫身其早歸。無汙蛟鰐涎。

擬古

松柏抱奇姿。自應能歲寒。離菊蓋小草。後雕良獨難。誰云一時芳。顧將比春蘭。蘭開桃李際。菊傲風霜闌。
呈尤運使表延之五首

往者江次對。不妄出薦口。門無雜選賓。麟角鼈肋九。斯文獨許公。是謂言可否。幾年闕通謁。今乃獲拜手。今時使者中。所進非一律。學術用其長。公獨名副實。江左更江右。非爲循更迭。政以歲方艱。當遣德星出。少年見公文。大類韓退之。集古一千卷。復楷歐少師。楷歐亦類韓。萬頃定渺瀰。於今到收斂。寧易窺涖涯。翰墨有先達。知己僅三數。省齋憐其貧。晦庵過其譽。懷哉介庵老。先我騎鯨去。公如幸教之。豈歎歲不與。青衿詩學爲。白髮步乃卻。茫茫悟中入。了了難邊覺。抱病每向人。誰有如神藥。公乎有異聞。靳爲啓玄鑰。

常州先生以太守入對五首

皇皇畿甸符。郁郁容臺禮。固殊彼奏召。有待今沃啟。上能格君心。次可裨國體。俗吏急簿書。細務紛鹽米。爭觀蘇翰林。未識李北海。獨能親話言。異彼想風采。徬徨計相烏。留滯寥蘭茝。五馬候南還。輕舟卽東匯。一州固匪輕。四海豈不重。與其事扶疎。孰若深培壅。驥不取德稱。馬多求駕馭。偉哉底柱功。障彼百川洶。青氈非舊物。喬木豈故國。家傳墨莊書。人嗣文靖德。欲知治興衰。是繫道滋熄。愚獨愧衣冠。自宜親稼穡。姑蘇訪虎邱。西庵作清遊。能談著書人。老僧非黑頭。義興望荆溪。景坡亦前修。不能乘桴者。滄波沒白鷗。
西庵有僧。猶及和靖解孟子諸事。
潘友恭云、景坡堂、蔣宜廟所築。

送趙叔自吏部知福州四首

當年治安策。通達如賈誼。汲黯不留內。似非朝廷美。得非蕭望之。政事要詳試。兩州已有聲。刺史還連帥。

人從閩中來。盡道閩中樂。舊穀旣年豐。今雨還時若。公行亦何事。重赴三山約。我乃願從之。微官還見縛。公雖去朝廷。祕殿通班在。不應獻納忠。於爾分內外。而况我此州。甘棠存蔽芾。旱疫苦相仍。要當蒙大賚。憶昨過辭公。去有湖外役。遲遲未能去。乃此困艱食。湖外米雖賤。早歲賈者多。賈多米必貴。吾飢其奈何。

呈陸嚴州五首

江山不因人。何以相發揮。人而非江山。興亦無所歸。是故新定郡。得公倍光輝。豈惟江山然。鷗鳥亦依依。簿領古白下。檄書走臨川。陳詩道所懷。奈此巍巍然。臨分得聞見。語以故有連。此意亦厚矣。乖離今十年。會稽巖壑林。新定山水藪。一焉喚來居。一焉煩出守。人言公未遇。我獨以爲不。得失彼此閒。於茲分薄厚。一代文翰主。百年風月懷。於今則所獨。視古良與偕。試評雲霧窗。孰與山水齋。況我方與嚴。身沈名不埋。往游金陵都。始攀石湖仙。爲我談公詩。大雅後有焉。謂我欠公詩。勉哉成其天。此語久不理。今朝墮公前。聞克齋舅氏。除江東提舉。以此寄賀。

春風桃李花。開落幾許時。諒彼松柏質。動有千歲期。舅氏早負名。不作窈窕姿。冰霜飽摧剝。未覺明堂遲。小休朱兩轡。四牡已載馳。斂散有常度。刺舉由我施。過家得上冢。偃薄寧久爲。又意漢廷上。鼓舞須厥辭。文章豈憎命。窮人詎因時。賤子盍自勉。毋庸罪毛錐。

寄賀周子充除左相留正除右相王謙仲除參政

淳熙十六年正月十九日。雪餘雨更作。有客方抱疾。忽傳底處書。昏暮叩蓬蓽。問之何許人。乃是吾家姪。書中道何爲。除日報甲乙。要令二父知。此意深所悉。我方盤谷歸。詎應聞黜陟。雖云在田野。又可忘輔弼。況於鄉里賢。與夫舊連率。及其先友家。投分亦頗密。恭惟三君子。德盛難具述。要皆由從官。以至秉政筆。于今天下事。孰得復孰失。仰思與夜繼。想不遑暇逸。置郵速傳命。頌口當四出。而我病不能。欲置還未畢。要歌夔臬詩。稱美寧敢溢。願觀勳業成。公論斯可必。曾聞烏鳴春。氣應還唧唧。喜甚屐且折。憂深緯寧恤。子暢尉曹秩。滿侍親。攝戶掾於上饒。賦詩二首以送之。

遊君父子閒。情誼等骨肉。那知三年度。但謂一日足。今晨復何事。溪頭有行舫。臨別慘莫言。徘徊謾瞻矚。平生幾游居。有親亦有故。一飯或相忘。素書不能屢。心知世情薄。但益古人慕。如君父子賢。百蓋一二數。寄曾運使

知名必曹劉。乃可暗中索。無聞若我曹。過眼誰復憶。如何十年後。姓名猶見識。當時所陳詩。亦復能道說。豈我能致然。先生自爲德。維時歲云莫。歸路千山隔。見公不三四。身已限南北。迨茲去無由。乃悔來卒迫。况今落蠻夷。公且天咫尺。猶擬信州船。看竹茶山宅。

謝王使君

臥痾衡茅下。誰顧疾作門。忽傳故人書。犬吠雞爭喧。書陳使君賢。有好罔不惇。念子藥物須。萬錢致深恩。

我未謁使君。此饋曷見存。是風久寂寥。當於古人論。亟起欲下拜。輾轉足但捫。事殊送酒家。孤負老瓦盆。食粥已數月。政類顏平原。呼僮糴新粳。洗甑汲井渾。鄰蔬價不二。取足充盤飧。豈止飽妻孥。自可留弟昆。聊寬口腹累。姑置襦袴溫。惟我困流落。寄迹無田園。東南數十州。遍走如乞墦。今者屬有役。病縛不得奔。幾思出入勞。復慮霜雪繁。使君儻加惠。茲又何足言。屢將入城府。跼蹐駒在轅。因風道感謝。情至筆載援。

送劉得華赴漢陽教授二首

昔公去太學。士曰奪我師。今公去皇閣。里閭極公思。公何德於人。曰公勇於義。使其用於時。其效何止是。漢陽在何許。越在河之北。聖朝富文物。要使均萬國。輟我學省彥。以爲遠方重。化成亟歸來。明堂待梁棟。席上奉呈歐陽教授。時併餞戴兄。故其中及之。

良由姿不敏。所以須朋友。朋友多得人。不忍相瑕垢。萬安初經過。渝水重邂逅。君今分教來。我政官曹守。何期逃虛中。乃值平生舊。蠻山雖云荒。蠻水亦頗秀。功名漢將餘。草木騷人後。春園縱芳歇。夏屋屬陰茂。官池荷卷舒。野寺泉波驟。追隨方自茲。留落復何有。合者故慰心。離者頻回首。聊歌五字詩。以侑一杯酒。

送施教授

盛心蓋俗忘。姦聲其道傷。摻別伊何吟。停杯慨以慷。君官上饒郡。分教明虞唐。俄而及瓜代。朝天架康莊。巖廊冠劍地。學省翰墨場。失人易揣摩。失己勞酌量。情融香梅葩。玉水春茫茫。鴻毛遇順風。市朝在錢塘。

送彭孚先赴辰州教授

因行碧湘門。倏念黃草尾。曩辭戴安道。同者歐陽子。那知三年過。僅謂一日爾。惟辰雖陋邦。分教多名士。前瞻固高明。後至復奇偉。天將惠其俗。賢者不自鄙。流傳幾人說。邂逅一見喜。談論未云終。別袂已復起。勿謂隔沅湘。因來致蘭芷。

送梁仁伯赴江陵丞三首

往者左司公。會作荊州牧。君時雖從行。所志惟誦讀。今焉去爲吏。與昔當異躅。試以身所經。參之耳曾熟。直道多不容。枉道夫豈可。直道誠忤人。枉道還喪我。如君直有餘。爲計亦多左。而我枉未能。若爲逃轍軻。君寧澧之蘭。我擬沅之茝。邂逅桃花源。一笑若相待。那知青草湖。追隨復連載。南浦問何邊。冰谿復安在。挽宋柳州授

少陵在大歷。涪翁在元祐。相去幾百載。合若出一手。流傳到徐洪。繼起鳴江右。遂令風雅作。千載亡遺究。猗歟宋柳州。有志諸公後。作詩匪雕琢。氣口先忠厚。銳鋒深自斂。至寶不輕售。行年且半百。纔爲嶠南守。嶠南山水佳。中州未曾有。慨然遠游意。不憚萬里走。下車甫葺年。已上政成奏。無何天作孽。一病藥莫掄。跼壽回乃天。天理果大謬。諸郎有家法。處已知孝友。崎嶇窮川陸。寓郡還公匱。卜龜得安宅。厥後斯雲覆。自憐蹤迹脫。敢敘親且舊。作詩寫餘哀。清淚空如霽。

讀呂益卿所寄詩編明日四月一日也。

舊雨連今雨。空庭斷行跡。有時出門看。平湖四無壁。忽傳何處書。令我喜折屐。新知呂夫子。寄我詩滿冊。是時羊牛下。攜之就簷隙。首披山居賦。奇字多莫識。徐徐見關鍵。坦若由戶出。定師離騷經。不人相如室。秋懷似選詩。法嚴仍事實。白沙龍陽作。如杜紀行役。卒至同谷吟。三讀淚橫臆。君何知之晚。今古蓋一律。兒曹苦問爺。何事爾不懌。徑臥忘解衣。中夜猶太息。曉窗啼鵲喧。今日復何日。和以扶疎篇。吾馭真可叱。夢趙文鼎書寄斯遠。

我不見君死。直疑君固生。賦詩無所寄。始復爲失聲。雞窗已三號。不但當旣鳴。恍云秋之中。取酒相與傾。坐有饋生魚。歡言事煎烹。飲我謂杯小。何翅一再行。落月落未落。猶疑見鮮明。已焉覺夢爾。起坐神未平。滄波渺萬里。底處尋騎鯨。悵望莫子語。徘徊空思盈。

重陽近矣。風雨驟至。誦邠老滿城風雨近重陽句。輒爲一章。書呈教授沅陵。

好詩不在多。自足傳不朽。池塘生春草。餘句世無取。詩家黃州潘。蘇黃逮師友。六義極淵源。一貫相授受。秋風有奇思。簞瓢忘巷陋。奈何催租人。敗之不使就。我謂此七字。已敵三千首。政使無敗者。意盡終難又。縱令葺成章。未免加釘飯。衣錦欲尙綱。何嘗炫文繡。一洗凡馬空。浪說充天廐。重陽晴則已。雨必風在口。今茲季月來。陰雨變時候。悵悵爵羅門。寂寂鳥噪牖。黃花冷未芳。黃葉埽復有。頗將寫吾懷。渠在那出手。

併想東籬人。瞻前忽焉後。

重賦畏知寓齋

君昔少年日。起家官帝城。諸公盛稱許。往往動得名。夷途一步趨。可到公與卿。永懷松柏堅。高謝桃李榮。謚齋迺曰漸。毫髮無妄行。惟時尹夫子。猶躬南山耕。是公妙言語。一字與不輕。銘能爲君述。君志益以明。蹉跎纔幾何。白髮殆數莖。低回尙前銜。牢落方南征。瀟湘清絕地。屈賈放逐情。感今重惻古。慨嘆識此生。究竟漸之義。顧未忘藥萌。彼哉少年事。老矣夫何營。徹之易以寓。俯夢仰輒驚。何止宦爲客。身悟浮雲更。南軒子張子。好學如元成。奮然吐長句。真覺萬戶輕。尹張志則異。與君盡同盟。見君極空洞。不比小器盈。嗣宗絕臧否。白眼常若瞋。司馬萬事好。是中差自宏。看君接物際。二士蓋熟評。君今家山居。扁榜猶在桁。傍陳漆園書。立參輿倚衡。因茲大有得。居窮亦如亨。嗟我道學晚。頗困塵網撓。性又多忤物。舉足逢溝阬。誓將過君齋。指南問初程。但恐持寸莛。莫致洪鐘鳴。

有懷子肅讀其詩卷因成數語

退之以文鳴。餘事尤長詩。名家賈孟流。未必踰於斯。淵明工五言。亦有歸來辭。迺知意到處。百發無一虧。孫侯絕人才。詩文俱中規。究其所源流。蓋匪一日基。有如審言門。遂至杜拾遺。餘波被芝蘭。同功有埏篴。嗟予晚聞道。未易等級推。劇談每從容。瞠若莫可追。閒窗念從公。兩脚如縶維。探囊獲新句。亦足慰所思。

將謁介庵以詩先之

溪山故無盡。隨取隨以足。平生笑賀監。勅賜鏡湖曲。今代介庵老。未歸先築屋。一區占何地。琵琶欣在目。是洲出誰氏。詩自隨州續。當年名絕唱。今也安可獨。溪如益彎環。山爲增隱伏。以知得所託。水潤由韞玉。一朝起乘傳。屢疏乞祠祿。俞音落天上。行裝不待束。還家謝溪山。拄杖巾一幅。開堂會賓友。快語瀉鄙醜。我時得得來。奉履期追逐。維摩適示病。對客倦冠服。悠然失前瞻。重詣規再卜。尺書往問訊。勞公手親復。愛我誨我至。敬拜不敢瀆。自憐生無資。是役尤僕僕。轅駒豈忘遠。歸棹戒已宿。但乞老先生。一言壯空麓。書田中問示成父。

每逢田中來。必問田中事。言者爲蹙額。聽者爲酸鼻。皆云水節愆。所以陂修廢。田栽未曾了。旱勢已復至。承天無可說。有淀亦將旣。早禾以日論。晚禾尙月計。餓莩已五六。疫死又三四。自茲儻無雨。何以能卒歲。詩成道危苦。示爾應歔歔。

送逸遠歸上饒赴試

謂汝可勿去。汝去意已堅。念欲終不遣。汝請倍諄然。平時父母傍。一事略不與。及今身自行。凡百誰汝護。况當苦炎熱。道遠不可說。晚須背斜陽。曉要踏踐月。墟落乃可爾。陂湖深戒之。藥物務頻進。童馬勿過疲。得失渠有命。勉旃非日競。汝解事文科。吾其老三徑。汝歸見吾友。見叔仍見舅。爲道糠覈肥。無奈相思瘦。

寄在伯三首。後一首併示逸遠。

出門欲尋巖。聞君已行舟。川遠不可涉。佇立空夷猶。雨風既冥冥。離思復幽幽。人生苟無別。安能成白頭。君行日已遠。我思日益長。何物可諭此。山高水茫茫。人生要有別。男兒志四方。奈此老多感。況於朋友良。兒行欣得師。爺往愁欠友。去爺勿惘然。得師知慰否。有時頻執經。無事莫多酒。無謂數月程。秋風在回首。

寄主管舅二首

少公上黃扉。長公思玉局。恭惟我舅氏。出處似前躅。潯陽開三徑。鏡湖賜一曲。是爲千載人。何有萬鍾祿。新詩久不誦。妙墨時在目。黃落又秋風。林空見松竹。甥官楚西南。舅往天尺五。安否候何如。歲月曠如許。阿兄有書來。報道安輿舉。東閣故莫留。西湖要爲主。寥寥和靖君。遺跡墮榛莽。咫尺到梅花。追隨悵修阻。

寄衡州舅氏

西山有喬松。蒙附百畝陰。蓬蒿宅其下。旅生亦駸駸。永懷豫章公。斯文金玉音。徐洪蓋出自。源流高以深。吾舅之於黃。端若一體臨。媿我望數子。引尺那及尋。弱冠誦流傳。蒼蒼且垂簪。前帆去已駛。後舟政憂沈。憶昨送弟行。作詩道離襟。末篇何所言。志我念母心。豈知辱况答。砭砭致瑣琳。退之贈郊籍。少陵寄高岑。我固解公意。誨我力自任。不惟書諸紳。起居見前參。幾思侍公側。取酒親酌斟。積荒賴鋤耰。痼疾靳砭鍼。